

ZAKON

O EKONOMSKO SOCIJALNOM VIJEĆU ZA TERITORIJU FBiH

I UVODNE ODREDBE

Član 1.

Ovim zakonom utvrđuju se osnivanje, principi djelovanja, sastav, način odlučivanja, djelokrug rada i nadležnosti Ekonomsko-Socijalnog Vijeća (u daljem tekstu: **ESV**), kao najvišeg institucionalnog oblika za vođenje tripartitnog socijalnog dijaloga, na **teritotiji** FBiH, kao i druga pitanja značajna za rad Ekonomsko-Socijalnog vijeća.

Član 2.

Ekonomsko-Socijalno vijeće je nezavisno tijelo koje čine:

- Za teritoriju Federacije BiH: predstavnici Vlade FBiH, predstavnici reprezentativnih udruženja poslodavaca registrovanih u Federaciji BiH i predstavnici reprezentativnih sindikata registrovanih na teritoriji Federacije BiH.
- Za teritoriju kantona predstavnici Vlade kantona, predstavnici reprezentativnih udruženja poslodavaca registrovanih u Federaciji BiH i predstavnici reprezentativnih sindikata registrovanih na teritoriji Federacije BiH.

Član 3.

Osnivanje, organizacija, nadležnost Ekonomsko-Socijalnih vijeća za teritoriju kantona uređuje se kantonalnim propisom. Do donošenja tih propisa navedena pitanja regulišu se sporazumom ekonomsko-socijalnih partnera.

Član 4.

Ekonomsko-Socijalno vijeće ima svojstvo pravnog lica.

Registracija Ekonomsko-socijalnog vijeća vrši se kod federalnog ministarstva nadležnog za poslove rada.

Napomena: Vlada ima primjedbu na prethodne stavove i smatra da ESV-a ne treba da ima svjstvo pravnog lica niti da se posebno registruje u Ministarstvu stoga je potrebno ponuditi rješenje za prethodne stavove.

Troškove za rad Ekonomsko-Socijalnog vijeća FBiH **snosi** Vlada FBiH u budžetu, a troškove Ekonomsko-Socijalnog vijeća za područje kantona Vlada kantona

Sjedište Ekonomsko-Socijalnog vijeća za FBiH je u Sarajevu a za područje kantona u sjedištima kantona.

Član 5.

ESV svoje djelovanje zasniva na principima :

- vođenja socijalnog dijaloga kao sistema za rješavanje odnosa između socijalnih partnera i sredstva za postizanje ravnoteže između tržišne ekonomije i socijalne pravde;
- poštivanja nezavisnosti i autonomije socijalnih partnera u njihovom radu i organiziranju;
- obezbjeđivanja slobodnog pristupa adekvatnim i blagovremenim informacijama i dokumentaciji značajnoj za pitanja o kojima odlučuje ESV;
- poštivanja i provođenja odluka i zaključaka ESV.

II DJELOKRUG RADA

Član 6.

Ekonomsko-Socijalno vijeće kao najviše tripartitno tijelo na teritoriji Federacije Bosne i Hercegovine osniva se u cilju ostvarivanja i usklađivanja ekonomske i socijalne politike, odnosno interesa zaposlenika i poslodavaca, te podsticanja zaključivanja i primjene kolektivnih ugovora i njihovog usklađivanja sa mjerama ekonomske i socijalne politike.

Član 7.

Ekonomsko socijalno vijeće:

- prati, razmatra i ocjenjuje uticaj ekonomske i socijalne politike i mjera ekonomske i socijalne politike na razvoj i socijalnu stabilnost;
- razmatra, podstiče zaključivanje i ocjenjuje primjenu kolektivnih ugovora i s tim u vezi dostavlja informacije i obrazloženja ministarstvu nadležnom za rad;
- podstiče mirno rješavanje kolektivnih radnih sporova;
- predlaže Vladi, poslodavcima i sindikatima vođenje usklađene politike cijena i plata;
- podstiče ideju tripartitnog, bipartitnog i drugih oblika socijalnog dijaloga na svim nivoima u rješavanju ekonomskih i socijalnih pitanja i problema;
- prati, razmatra i predlaže eventualne promjene zakona od uticaja na ekonomski i socijalni razvoj i u tom kontekstu položaj zaposlenika i poslodavaca;
- razmatra nacрте zakona, podzakonskih akata, programa i drugih dokumenata iz djelokruga svog rada i svoja mišljenja o tim dokumentima dostavlja Vladi Federacije Bosne i Hercegovine i Parlamentu Federacije Bosne i Hercegovine;
- prati primjenu zakona i ostvarivanje prava iz oblasti rada i socijalne sigurnosti i predlaže nadležnim organima i institucijama mjere za ostvarivanje i unaprijeđivanje tih prava;
- bavi se problemima provođenja procesa privatizacije i predlaže nadležnim institucijama eventualne izmjene zakonskih i podzakonskih akata koje bi doprinjele većim finansijskim efektima i zapošljavanju;
- prati stanje na području zapošljavanja, penzijsko - invalidskog i zdravstvenog osiguranja i u tom kontekstu vodi aktivnosti na smanjenju crnog tržišta radne snage;
- podstiče aktivnosti na većoj efikasnosti nadležnih institucija sistema na sprječavanju korupcije,
- strategije razvija pojedinih oblasti.

- Program rada vlade

ESV donosi Poslovnik o svom radu.

III SASTAV EKONOMSKO-SOCIJALNOG VIJEĆA

Član 8.

Ekonomsko-socijalno vijeće ima 18 članova.

Ekonomsko-socijalno vijeće čini šest predstavnika Vlade FBiH, šest predstavnika sindikata i šest predstavnika poslodavaca.

Svaka od delegacija samostalno bira predsjednika svoje delegacije.

Članovi ekonomsko-socijalnog vijeća imenuju se na 4 (četiri) godine.

Svaki član vijeća ima svog zamjenika, koji ga u slučaju odsutnosti zamjenjuje na sjednicama.

Predsjednici delegacija ESV-a smjenjuju se predsjedavanjem Ekonomsko socijalnog vijeća svakih 8. mjeseci ukoliko Poslovnikom o radu nije drugačije uređeno.

Član 9.

Vlada imenuje i razrješava svoje predstavnike u Ekonomsko-Socijalnom vijeću na prijedlog ministra nadležnog za poslove rada, a predstavnike sindikata i poslodavaca imenuju i razrješavaju sindikati i poslodavci.

Član ESV-a ima pravo na naknadu za rad u ESV-u.

Ukoliko član ESV-a neopravdano odsustvuje sa sjednice ESV-a nema pravo na naknadu za taj mjesec.

Član 10.

Članu Ekonomsko-Socijalnog vijeća prestaje članstvo:

- smrću člana
- ostavkom
- istekom roka na koji je imenovan

- ako je pravosnažno osuđen na безусловnu kaznu zatvora u trajanju **dužem od tri mjesecadanom stupanja na izdržavanje kazne.**
- razrješenjem.

U slučaju neopravdanog izostanka nekog od članova ESV-a na tri sjednice ESV-a, može se donijeti odluka o njegovom razrješenju.

U slučaju prestanka članstva za člana ekonomsko socijalnog vijeća ekonomsko-socijalni partneri **imenuju** drugog člana najduže do isteka mandata trenutno saziva ekonomsko-socijalnog vijeća.

Član 11.

Predsjedavajući ESV:

- predstavlja ESV;
- saziva sjednice i utvrđuje prijedlog dnevnog reda za sjednice ESV uz konsultaciju sa predsjedavajućim delegacija;
- nadzire izvršavanje odluka i zaključaka ESV;
- i obavlja i druge poslove koje mu povjeri ESV.

Predsjedavajućeg ESV u slučaju njegove odsutnosti zamjenjuje jedan od predsjednika delegacije naizmjenično.

IV UNUTRAŠNJA ORGANIZACIJA

Član 12.

Organizacione i administrativno tehničke poslove za Ekonomsko-Socijalno vijeće obavlja sekretarijat Ekonomsko-Socijalnog vijeća.

Sekretarijatom rukovodi sekretar kojeg Ekonomsko-Socijalno vijeće imenuje na period od 4 godine.

Član 13.

Ekonomsko socijalno vijeće, na prijedlog sekretara donosi akt o unutrašnjoj organizaciji, na koji saglasnost daje vlada.

Napomena: Obzirom da su predstavnici Vlade imali primjedbe na član 4. ovog Zakona potrebno je da dostave prijedlog za član 4 kao i za prethodna dva člana tj. član 12 i član 13 ovog Zakona.

Član 14.

Ekonomsko-socijalno vijeće može da obrazuje stalna i privremena radna tijela za razmatranje i predlaganje stavova po pojedinim oblastima, a naročito za :

. politiku plata i kolektivnih ugovora;

- . porezni sistem, zapošljavanje i socijalnu politiku;
- . privatizaciju;
- . zakonodavstvo, provođenje propisa i ostvarivanje zaštite prava ;
- . javne djelatnosti;
- . entitetske i međunarodne odnose;
- . podsticaj izvoza;
- . politiku stranih ulaganja;
- . standardizaciju;
- . međunarodni transport;
- . energetska politiku.

Mišljenja koja daju povjerenstva o određenim pitanjima obavezno se prezentiraju ESV prilikom razmatranja tih pitanja na ESV.

Povjerenstva obavezno jednom godišnje podnose izvještaj o svom radu ESV.

Odlukom o formiranju povjerenstva utvrđuje se djelokrug i način njihovog rada.

V NADLEŽNOST I NAČIN ODLUČIVANJA EKONOMSKO-SOCIJALNOG VIJEĆA

Član 15.

Ekonomsko-socijalno vijeće razmatra **prednacrt odnosno** nacrt zakona i prijedloge drugih propisa iz člana 6. Ovog zakona.

Ekonomsko-socijalno vijeće će na osnovu usvojenog Programa rada Vlade FBiH, dostaviti vladi pregled propisa koje želi da razmtra i da na njih da mišljenje.

Svako ministarstvo je dužno da ESV vijeću dostavi **prednacrt odnosno** nacrt zakona i podzakonskih akata iz njihove nadležnosti.

Ministarstvo je dužno da u roku od najviše 30 (trideset) dana od dana dostavljanja mišljenja obavjesti **Vladu i** Ekonomsko-Socijalno vijeće o svojim stavovima.

Član 16.

Ako ministarstvo ne **obavijesti Vladu o stavu ESV-a**, Ekonomsko-Socijalno vijeće može svoje mišljenje **direktno** dostaviti Vladi.

Vlada je dužna u roku od najviše 30 dana od dana dostavljanja mišljenja obavijesti Ekonomsko-Socijalno vijeće o svojim stavovima.

Član 17.

Ako Vlada ne prihvati mišljenje ili ga samo djelimično prihvati, Ekonomsko-Socijalno vijeće može svoje mišljenje dostaviti Parlamentu FBiH.

ESV odnosno ekonomsko-socijalni partner čije mišljenje nije prihvaćeno od strane vlade ima pravo da svoje mišljenje dostavi u pismenoj formi Parlamentu FBiH i ima pravo da svoje mišljenje obrazloži na parlamentarnim komisijama i sjednicama oba doma parlamenta.

Član 18.

Odluke Ekonomsko socijalnog vijeća donose se konsensusom socijalnih partnera.

Prilikom glasanja socijalni partneri glasaju odvojeno i o rezultatima svog glasanja izvještavaju ESV.

ESV može odlučiti da svi socijalni partneri glasaju zajedno kada se radi o proceduralnim i tehničkim pitanjima.

Svaki socijalni partner ima mogućnost i pravo da izrazi svoje vlastito mišljenje o zaključcima i odlukama ESV.

VII SJEDNICE

Član 19.

ESV održava svoje redovne sjednice u pravilu jednom mjesečno, a najmanje jednom u 60 (šezdeset) dana.

Predsjednik ESV dužan je sazvati sjednicu na zahtjev ESV ili jednog od socijalnih partnera.

Socijalni partner koji traži vanrednu sjednicu, dužan je isti pismeno obrazložiti i dostaviti sekretarijatu ESV-a. Predsjednik ESV-a je obavezan da u roku od najdalje pet dana zakaže vanrednu sjednicu ESV-a.

Član 20.

U radu ESV mogu učestvovati i neovisni stručnjaci iz različitih oblasti, predstavnici nevladinog sektora, kao stalni savjetnici bez prava glasa.

ESV može za potrebe svoga rada angažirati različite institucije, stručne organizacije i eksperte.

Na svoje sjednice, zavisno od pitanja koja se razmatraju, ESV može pozivati stručnjake iz tih oblasti, predstavnike sindikata i poslodavaca koji nisu zastupljeni u ESV.

PRELAZNE I ZAVRŠNE ODREDBE

Član 21.

Članovi Ekonomsko-Socijalnog vijeća, imenovani prije stupanja na snagu ovog zakona, ostaju na svojim funkcijama do isteka mandata.

Član 22.

Ekonomsko socijalno vijeće će izabrati Sekretara u roku od 90 dana po stupanju na snagu ovog zakona.

Član 23.

Visina i način isplate naknade za članove ESV-a uredit će se posebnim aktom ESV-a.

ESV je dužno da akt iz stava 1. donese u roku od 30 dana od dana stupanja na snagu ovog Zakona.

Član 24.

Ekonomsko-Socijalno vijeće će donijeti akt iz člana 11. Ovog zakona u roku od 15 dana od dana imenovanja sekretara.

Član 25.

Ovaj zakon stupa na snagu osmog dana od dana objavljivanja u Službenim novinama FBiH.